

Blandina Monn-Berther *1937 - +2014

bb -Enteifer in gnanc schi liung temps ha la mort spluntau treis gadas a Rueras el quartier enagiudem il vitg. Duas gadas nunspitgadamein e tier la davosa gada haveva ella dau d'entellir ch'ella seigi aunc adina leu da casa. Dapi igl onn 2010 ei Blandina Monn-Berther stada taccada dalla malsogna dil cancer. Ella, ina femna dalla lavur, ina pura tras e tras ha stuiu su ttacumber. La malsogna ha spossau ella pli e pli ed igl emprem da mars eis ella spartida.



Dapi il mument ch'ella ed ils ses han udiu dalla malsogna ei la veta semidada da rudien per l'entira famiglia. Il viver denter speranza da dumignar ed il pitir duront dis e notgs fa resignar il carstgaun plaun a plaun. La davosa gada che jeu hai entupau la Blandina e siu um Paul ei stau da Daniev 2014. Els fagevan ina cuorta spassegiada tras il vitg. Miu salid da quei di ei staus «in bien niev onn», mo savend che quel savess esser vans. Savend che la malsogna dil cancer duvrava gia lura tutta forza dalla Blandina. La struclada dil maun da quei di ei aschia staus il cumiau denter nus dus.

Ussa sesprovel da tschaffar en plaids ina veta che ha cuzzau strusch 77 onns. Scriver in necrolog ei mai sempel. Pér cheu sefan ins en con pauc ch'ins sa magari da nos pli vischins. Malgrad che

nus essan carschi si e vivi el medem vitg, parentai in cun l'auter e dau bein enqual paterlada, sefetschel en quels muments con spert ins sa viver in sper l'auter ora.

Blandina Monn-Berther ei naschida orasum il vitg da Rueras ils 12 da mars 1937 en la famiglia dils Toni Maisters, Carschida si eis ella cun siat ulteriurs fargliuns. Il bab, Gion Antoni Berther fageva il scrinari, dasperas empau il pur. La mumma Lisabet, naschida Deplaz, era casarina e pura. Sco tuttas famiglias da quei temps havevan era els in menaschi che pretendeva da scadin commember dalla famiglia lavur ed engaschi. Igli agid dils affons era dumandaus, vegneva pretendius e quels vegnevan era buca schanegiai. Era

la Blandina ha retschiert cheu il senn da luvrar, da purtar responsabludad e d' urar. La fin da mars 1958 ei siu bab morts tut anetg. Ina frida nundetga per la Blandina, ella che haveva special bugen siu bab ed era fetg loscha dad el. Meinsvart han ins sentiu pli tard en discours quella attaschadad speziala per siu bab e che quella plaga ha duvrau fetg bia temps per medegar.

Sunter l'affonza e temps da scola ha ella astgau emprender da cusunza. In mistregn chiei bein staus survius pli tard ad ella.

Cun 25 onns, ils 28 da fevrer 1962 , eis ella secasada enagjudem il vitg da Rueras. Quei di han il Paul Monn e la Blandina giu nozzas. Cheu ei per propi la pura sedestadada en ella. Els dus han baghegiau si in bi bein puril. Per dumignar il buordi finanzial ha ella passentau bia notgs ora cun cuser e cuntschar per auters.

Da lur lètg ein 5 affons sorti, 3 buobas e dus buobs. Deplorablamein ei la feglia Rita morta gia en la vegliadetgn da mo dus onns. Ina greva frida, che ha consumau bia forza. L'educaziun religiosa ei forsa stada sia scompa e capara da dumignar tallas grevas fridas.

La Blandina ei stada ina pura incarnada. Bein haveva ella temps per in discuors e per ina viseta era igl esch casa adina aviarts. Mo era cheu era ella adina fatschentada cun da tuttas sorts lavur. Sia luschezia, sia cuntentienscha ei stada sia famiglia, las plazzas da ses affons, ses biadis, il puresser, ils products ch'ella saveva vender, fatgs da siu agen maun.

Tgei plascher ei quei stau per ella cura che siu fegl Daniel ha surpriu igl onn 1995 il puresser. Igl ei bein stau ina satisfacziun da veser che lur lavur, baghegiada si el suadetsch da lur fatscha, ha survegniu cuntuaziun. Quei ha buca muntau per ella da seser ussa sin la supbia gronda e guder temps liber. Ella ha luvrau vinavon en casa, en iert e sil bein puril e dasperas priu dapli temps per ses biadis.

Quei ein stadas zacontas staziuns dalla veta d'ina mumma, d'ina pura, d'ina femna che ha viviu en nies miez, che ha ton sco jeu sai strusch bandunau nossu val per pli ditg. Ina femna rentada vid il tratsch, il tratsch che ha dau fadigia e valur a sia veta. Mo co ei la persuna Blandina stada? Eis ella stada cuntenta? Ualtri carteivel ha ella mai tschentau quella damonda, pertgei sia devisa ei adina stada famiglia e lavur. E schar dar tut quei ord maun ei iu vess, fetg vess. Denton ha la malsogna spissaou pli e pli fetg ella, il davos

fevrer ei siu davos viadi stau quel el spital a Glion nua ch'ella ei spartida il di suenter.

Cara Blandina, malgrad che la malsogna ha scursaniu Tia veta pli spert che quei che Ti has giavischau, sperel che quei che nus empruein da crer, seigi vegniu realitad per Tei e Ti hagies contonschiu quella patria celestiala che lai emblidar tut il terrester. A nus rest'ei d'engraziar a Ti per tut e che Ti possies ruassar en pasch.